

Frå:

Ostereidet Bygdelag

Til:

Alver kommune

Høyringsinnspel kommunedelplan kultur, idrett og friluftsliv frå Ostereidet Bygdelag

Ostereidet bygdelag har merka seg at planen som no er på høyring tek utgangspunkt i kommuneplanen sin samfunnsdel, som legg fram breie ambisjonar for kulturfeltet dei neste 12 åra.

Vidare at planforslaget skal gi overordna retning og oppdrag for 12-årsperioden, og konkretisere korleis Alver kommune skal følgje opp desse gjennom handlingsprogram og underordna arbeidsstrategiar.

Ostereidet Bygdelag meiner at planen har flotte og viktige ambisjonar på svært mange og viktige område innanfor kulturfeltet. Delmåla er gjennomtenkt og dei ulike vegvala er konkrete og gode, og tilpassa delmåla.

Bygdelaget vil peike på at Ostereidet er ein av dei fire lokalsentra (Manger, Lindås, Frekhaug og Ostereidet) i tillegg til regionsenteret Knarvik, som er definert i samfunnsdelen, og som skal utviklast som dei sentrale tettstadane. Her skal hovudtyngda av tenester og tilbod liggja (sjå under avsnittet «*Prinsipp for offentlege tenester/tilbod*» i kap. «**Prinsipp for arealbruk**»). Samstundes vil bygdelaget peike på at Ostereidet er den einaste av desse fire definerte sentra som manglar fleirbrukshall. Knarvik har to, i tillegg har både Leiknes og Alversund fått sine hallar. Utviklinga dei siste åra har difor medført at barn og unge som soknar til Ostereidet har eit mykje dårlegare aktivitetstilbod enn dei fleste andre ungdomar i Alver

kommune. Me ber difor om at planen under temaet: Møteplassar og aktivitet, vert definert inn eit nytt delmål med følgjande formulering:

Alle lokalsentra i Alver skal ha gode møteplassar for barn og unge.

Vidare ber ein om følgjande formulering kjem inn som eit nytt og sjølvstendig vegval :

Alle lokalsentra skal ha fleirbrukshallar som skal sikra likeverdige og allsidige aktivitetstilbod for barn og unge.

Bygdelaget har gått gjennom handlingsprogrammet, og ber om at følgjande formulering vert teke inn på side 5 om kulturskulen:

Etablere fleire kulturskuletilbod i alle dei definerte lokalsentra, med oppstart 2023.

På side 6 om Strilabiblioteket ber ein om at følgjande formulering vert teke inn som nytt punkt 8:

Reetablere folkebiblioteket på Ostereidet.

På side 9 om idrettsaktivitet ber ein om at følgjande formulering vert teke inn som nytt punkt 6:

Starta bygging av fleirbrukshall på Ostereidet. Oppstart 2024.

Med ønskje om ein god plan for alle innbyggjarar i Alver kommune.

Venleg helsing

Ola Jordal

Leiar i Ostereidet Bygdelag